



Мэбета вадава" ила' панан' етри' мэква"!

# НЯРЪЯНА

## НЭРМ

ГАЗЕТА 1931 ПО' АПРЕЛЬ ИРЫ' ЮКАД ВАТА ХАСАВАЮДИМДЕЙ ЯЛЯХАД НУДИБЕРҢА

СИ' ИВ ЯЛЯХАНА НОПОЙ' СЕРТАБИВА'



№ 21 (5243)  
2025 по'  
май иры'  
24 яля

СУББОТА

Российская Федерация Ямало-Ненецкий автономный округ



Сидяңг: А.Ткачев' тадтавы

Няд'маңэ  
мэ'жава"

2

## Халядани лаханако ня'жаць



Сидяңг: t.me/Ugai\_UK няд ханавы

Ты" саполана ирыхына округна" нэвахы ерв Дмитрий Артюхов янда терха"на лаханакурманда мальгана ма"нисяв: «Халядана" ненэцие җани' тяхасовна нядаба пяңгуна". Пыдо' нямнандо' хахаяда яля' нэдалёлаңгува". Ханзер" илевамдо', җамгэ' то"олха няд'ма таравам' тидпой" нядандо' хонрамбаңгуна"». Пон' нива" җатен", хэвы си"ив яляхана ервона" Тасу' яв' няю' тэвормыць. Таняна халядана" ненэцие, общинахана манзарани, предприятийха"на мэни лаханако ня"жаць.

Пили" нюрте"э Ноя' няю' хан"мыць. Пуна Сэхэряван' нэдалёрҗаць. Таняна «Тазагрорыбпром» предприятий' тер лаханако ня"мыць. Тарҗа вадам' халядани" департамент' нэвахана мэна ерв Андрей Рубашин ваде"җась.

–Ненэця" хамедамбидо' – недбядо' ватавы халяндо' җокдахад пере. Җадьбято' варемдо' мэ"жа". Тикы' хавна җануто', ватаңго мэта хамэдырото' нямна лаханаць. Тад нерня' ту җануто' нулаңгалава' лаңго тамна савумдамбаңгудо'.

Җэрм' тер" серо тидхалембада департамент' ерв Ульяна Каленюк мась:

–Юр' мян' ненэциам' лаханако ня"мэва" җэңгува". Халя' мир' нямна, ватаванзь ваторпада халя җокад тяновормам', недбито' тянэ җэвам' хэтаць. Җануто' вомам' ваде"җаць. Тарем' нэдалёрҗь

тидпой" ханзер" манзаравамдо', илевамдо', җамгэ' нянандо' таравам' намдорҗава". Ханяңы" серодо' таняна яханандо' тасла ширьяна".

Туда' «Тазагрорыбпром» предприятий' халядана" салабанда хэвам' җате". Хибяхартадо' тэри ни" җамдо', мале җанудо' ит' нэкалма' нерня җахакуд хамекурҗа". Мал' яханато' пыдо' юнета" халядана" ненэця". Җавнандо' тамна иринадодо' тикы манзаям' минрець.

Лаханакурмандо' мальгана җоб" хонрамбавы тоенана серто' ёрма' нямна җась. Пилю" ирыхына яханандо' хой' поңгахана ёраць наукахана манзарана" учёной" сиддо' ни" җадарамбю". Тикы тоенана серм' ерводо' помнандо' няхар" по' ямбан' тасламбидо'. Небо' тарем' тасалкуро"махадандо' тарҗа иңут'

ха"амвйд": пилю" ирыхына сидя' ныланава яляхана ни" ёрат". Манзарава ялярихи-на поңгадо' моёпаңгудо'. Та' ёльцяңгана халя нисылава яханда, тиребямда хаеванзь тую' танаңга, җадьбята халяда вэва. Ненэй ненэцяңгана мияд халя' ёльцяңгана, сэври паңохона поңгадо' панҗа", җадьбято' тикы паңом' җэдаработ' вэва.

Тарем' халядана" ненэциамна пилю" иры' нэсонд' ядэрта". Небо' ервона" ты пэрти" нэсы"мана ядэрҗаць. Та' мальгана самляңг юр' мян' мяд" тер лаханако ня"жаць. Тарем' ты' җамзам' мирелець. Тюку поход ты пэрты" едэйвана тердевы" ты' падрон" аптечкиня"марпи". Тохолкода" илебей" ненэцие нядаби".

Марина Яр' падвы



Сидяңг: М.Яр' тадтавы

## Яна" ерв' табеко

Россияна" нэвахана мэна ерв нямэхэна Мурманск марад' нямна нэдалёрҗась. Тикы ядэро"манда пуд табеко" падарм' падвысь. Ненадовна маня" округна" ед' җэда вадада җани' тая.

Туда' пудана" похо"на «Северной широтной ход» нубета серм' нерня' минре". Җэрм' ё" няна илена ненэцие" илам' савумдамби". Табеконда ватовна Пэ" хоё" няна җэда «Снежинка» научной станция' проектм' нядангу". 2028 похона җадимбата серота, тая' минда сехэрым' 2029 похона мимба малебто' тараңгу. Сабетта хардахана тосакабтэда" серо табламбади" мя" җадимда. Саляңгардахана тирты җано' җамдолавам' мимба пяңгу". Россияна" Правительство неняңг" иры' нюртей яля' нэсонд' җэрм' я' ненадо хардо" няна сертаванда серо, есядо' таслаңгу. Едэй җадимдевы табеко' падарт' Саляңгард, Си"ив Харв, Новой Уренгой, Ноябрьск харад" еремыць. Дальневосточной федеральной округ' «доступное арендное жильё» программам' җани" җэрм' яха"на җэда" хардахана тад тованда по' лимбья' иры' нюртей яляхад хорпа пяңгудо'.

Таддикахад Владимир Путин 2029 по' нэсонд' Саля' яв' нимня вэңгалёванда пулм' мись табедамби. Тарем' Си"ив Харв' тер" таңга Ямална" ненадо хардан' тэворҗь пиртадо'. Тикы җарка серм' яханана" мале җахакуй" похот җатедо'. Ненэця" индо' ядэрабцо" җобт' ни" ха"мор". Ханяңыдо' ма"ним": «Пул нянана" ни тара"». Җани" лахана": «Ёльце тара». Си"ив Харв хардахана илена, хусувэй яля' манзаяханда Саляңгардан' нэдалёрта не инда ядэрабцом' хэтась:

–Мань тев' ёльцяңгана җули" тэтнасетыдм'. Манзаяни нэсонд' «воздушной подушка» нубета ханм' мэць ядэрцетыдм', ханяңэхэна тирты җанохона хэсетыдм'. Та' пароман' тисетыв". Я"авлада мерҗяхана сехэрэми мал' нэсеты. Пулм' мибто' таңга манзаяхани тэвортадамзь. Җарка тирты җанохона хэсь тарабта нумам' хурка җэвам' вунив тасламбаңгу". Саляңгардахана илена" еся сехэрэвна хэван' харвабто', җобтики Лабытнанги' нэсонд' таңга машинахана тэворта". Хабҗасавэй" саңговота" нехэ"на, Аксаркахад лекар" мят' миндахана җани' сава.

Нерняңы илма" несэймда, ни, тедари' пунси. Тарем' җод" җатенаңгува".

Анна Яптик' падвы

## Ѓатенава"

Маңгыт' иры' нердена" ялэ" пиркана Салехардахад ту җано" нюдя хардаха" җэдалёрць пэңгуд". Ѓани" районха"на ненэця" җобтыкыҗатена". Тадри' таңга и"мана таславы яхандо' тэва пиртадо'.

Салехард' җылы яха' и" са-лабанда хэңгадава' сер' җарка ту җано" минхандо' җадимда". Тедари' тамна «подушка»җэ нюбетари" җэдалёрҗа". Ёльце ме-рещь җопой лаңгхад няби лаңган' тэворҗа". җопой ненэцянд' тас-лавы билетанда мир" җока ни җа", 180 рубль. Саңговота' җавори", пад" е"эмня яңга тамна мале сян есям' салдаңгун. Салехард' няби Лабытнанги' помна ненэцие, машин тэволана" җарка ту җано" мале хамеды". җокханда мат" паром" вэркода". Салехардахад Зелёный Яр' ёльцянд' по' ямбан' җано" җэдалёрҗа".

җани хонравандара" таянбта, Салехардахана

**+7 (34922) 5-22-15,  
+7 (34922) 3-89-32  
телефонувна лаханада",  
Лабытнанги' няна  
+7 (908) 860-84-80**

телефонувна тарана юнм' намдаңгуда". Ненэцие" е"эмня тамна онлайн-камера" манзара". Таравандамалыҗана яха' вар' няна хурка җэвам' манэць пиртара". Ханяҗэри хардахана мэбга" җод" җахакуд сеҳэрэмда" тасламбира". Тадри' салаба хэңгадава' сер' тир-тя җанори" тирта".

## Теневада"

Ямальской район' няна ты ниць иры' 23 яляхад 28 яля' ёльцянд' Порц-Яха фактория' няби Яр-Сале' поңгана выңгана «Союз-2» нюбета ракета-но-ситель' пеля" тю"уд ха"морць пирта".

җадьбята районандо' ерв" ненэцие лэтрэ табедамби". «Не-ноховавна хубта' някуна ю" час-хад юкад вата сидя час' ёльцянд' Панаевск' няби Хадьта-Яха' пом-на, Яр-Сале' няби Порц-Яха' пом-на нёда" җэдалёр". Таяна җобкарт ненэць' яңгобта тара. Лэтрыда"! Теневада"! Тю"уд еся' пеля" ха"морца", – тарця юнм' вымна мюсерта" ненэцяңг" ваде"мы". Тарем' ты пэртя" җахакуд харда-хад юнм' намдавандо' сер' маям' ни" хоңгу".

Тарця серкат җэрм яна" тер" тенева". Хусувэй по' нуво" тяха' җэдабтавы ракета' пеля" тарем' ха"морцеты".

Тю"уд ха"амвы" ракета' еся' лоңг ханярина манэ"мы җэбта", ня"марпа вэва".

Галина Кинчина' падвы

## Няд"маңэ мэ"җава"



Сидяңг. А.Т.качэв' талтавы

Ямал' тиргэвна «Морошка» нюбета картам' ханярина няд"маңэ мэць пирҗава". Неноховав-на җармы" пенсияхана мэна" ненэцие" е"эмня таром' ха"аврамби. җацекы" тохолковандо' малыҗана тикы мутрам' җани' мэ"җадо'. җока нюсавэй" мяд' тер" тодо" няд"мидо' җобтыкы таянд хомбидо'.

Ямал' тер" поңгана сямьхат сава серҗэ толёда – «Морошка» картавна мирҗарка сеҳэры' мирм' салдамбава. җадьбята тарця программам' Госуслуги' няд"мяць телефонханато', компьютерханато' мэ"җадо'. Няби ё" вэт', җарка марк" җэдалёрта" тарем' билетадо' салдамбидо'.

Тандая' җани' җопой сава юн җадимьясь. Округна" җардавна тиртя җанохо"на сеҳэры' мирм' җани' едэй

про-граммавна салдамба пиртава". җопой билет 1500-2000 рубль' пирувна мир- т а тянворҗа. Едэй табеко җади"ма' пуд җэрм' тер" мале сидя ёнаркад вата билетм' тэмдавы". Теда' мале хор" ирыхына җэдалаванда" е"эмня билет мирдапи".

Тиртя җанохона ханяри' хэсь тарабата ненэць' билетдамда җахакуд АТК «Ямал» няби АК «Ямал» авиакомпания' сайтхана интернет' мутравна харта тэмдаңгу. Тарем' я"амбата җахат тотрев' аэропортхана тэмдорта.

Галина җокэй' падвы

## Я' паранавахад лэтрёва

Ты" ниць иры' 10 яляхад Ямал' җардавна я' паранавахад лэтрёва' паңо пэңгу". Закон' вато' сер' вэба' иры' 21 яля' ёль-цянд' җэңгу.

– Гидрометеорология' юн' сер' неняңг' ирыхына саць ядембаңгу. «Мале сян по' ямбан' хор" иры' нюртейяля' ёльцянд' лэтрэсетыва". Хор" ирыхына ядембада" ялена" мале яңгусеты". җадьбята тюку по' вэба' ирыхына манзаява" ёльцеңгува"», – Максим Михайловский я' сяр' нийм' лэтрамбади",

экология' серо ня"амбада департа-ментхана пэдари лэтамбада отдел нермбэртя лахана.

Харад" тер" ненэцие табе-дамбидо':

– пэдарахана ту пяңэ матормы" пя" мо нёйда" парадамбю",

– пэдаран', вынд' ныланаванзэ җэдалёрпата", мерця нумгана тутамда" нёда" пятабю",

– тум' сертабавы җэбта", хабтё-бэй тунда" җэсь ям' сюрте хэвхэм-да 50 см' пирувна сабка серо"җа. Хаёвы" ята"ма таянб", җарка туңэ ни" ханд".

Ям' парадавэңэ ня"амвы не-нэця' штраф' есям' салдамбаңгу. җардада самляңг – тет ёнар" җэсь пирҗада.

Ямалспас' тер" саць тэтнаңгу". Сэлмы" я" лэёмоңгад хусувэй яля' лэтрёда".

Няд"маңэ нюдяко тиртя җано, «беспилотник» мэта". Ханяри-на пэдари" поңгана, выңгана паранана ям' манэ"мы" ненэця" няндо' лаханаңгу".

Галина Окоэтто' падвы

## Сянем' ватавамдо' тасладо'



Сидяңг. М. Яр' талтавы

Округханана" предприятий" помна сыра' хибя сяңок халям' ватавам' хэвы си"ив яляхана намдаваць.

Сыра' ямбан' Ямалханана" 43 предприятий" тер" ватаңговы". Лимбья' ирыхыд сие ниць иры' җэсонд' халыдавы". җобкана җокханда 930 тонна

халям' җыдавы". Тикахатато':

нёя – 269 тонна, пыри – 285 тонна, лысу – 64 тонна җэвы". Предприятий" поңгад ва"лэйдо' җани' таянвы": МП «Аксарковское РПП» – 134 тонна, АО «Горковский рыбозавод» – 121 тонна, ООО «Святогор» – 88 тонна халям' җыдавы". Сямьхат җока халям' хадавы" – Приуральский районхана – 222 тоннам', Шурышкарский районхана – 203 тоннам'.

Тикад тянёмбовна җани" район" тер" предприятий" таром' ха"авравы".

Тюку по' җокавна пырим' ватавы". Теда' пред-приятыйха"на манзарана" таңы ватаңговахандо' хамекурҗа". Мер' салабанда хэб"ёртя" ёльцяңгананда ит' ха"маңгуд", небо' тарем' нись ерев", салабанда яноць хэсь, ёраць җод" яноларэйдаць.

Марина Яр' падвы

# Ныхым' мэта" ненэця"

**Хусувэй по' округна" тиңгивна «Спортивная элита Ямала» яна" смянхат ва"лэй" сёбар" ненэцие тэрабасеты". Тюку по' самляңг ю" Ямал' терм' нерня' мэвыць. Џокханда юкад вата хасава ю" «номинация» ңэвысь.**

Ты" ниць иры' юкад вата самлянзимдей яляхана Саяңгардахана сиддо' ма"лаць. Няхар" ю" тетридо' ненадумда"мидо' ня"муванзь товыць. Ханяңыто' ядэръидо' таниявыць, ңадьбятта нивыць ту".

Конкурсм' минрена" тэравы" сёбарто' тадта"ми мал' ңопой ян' ма"лавидонзь. Сидяңгато' падар" лабас" культура' мяд' лохо' мюня ңыдысь. Тикы" поңгана ненэй ненэця" ңани' мэць: Юрий Лаптандер, Эдита Ламдо, Матвей Лаптандер. Пыдо' мал' Приуральской район' няд ңа". Џули" мэбета", варемдо' мэта" ненэця". Хусувэйдо' ңэрм' тер" сянакобц пир"манда няю' «Мастер спорта России» нюмам' мэ"ңа. Хэвы похона хуркари" яна" тиңгивна ңэвы" чемпионатха"на нюртей ян' ха"мормы". Сыктывкар хардахана ңэвы Россия' Кубокхана, Красноярскхана ңэвы Россия' чемпионатхана сёбар' ңэвандо' нямна няхатато' сасаркавы". Сян мэва' пыхыдадо', теневабодо' сававна манэ"лабтамбавы".

Юрий Лаптандерм' мэбе"манда е"эмня теда' «Лучший спортсмен по национальным видам спорта» нюмгана нюмдедонзь. Эдита Ламдом' няби Матвей Лаптандерм' «Лучший спортсмен сельских районов ЯНАО» нюмгана нюмдеңахаюдонзь.

Ненадумдавыто' поңгана юне-



Сидяңг: А. Ткачёв' тадтавы"

та сянэрта", ңынхад енерта", саңговота еся лоңг илыбада", теннисхана сянакода", тыретана" мэ". Тикы' хавна ңацеке тохо-

ламбади, тренер, судья, сёбар" е"эмня пирдырма ңадимдембади, сёбар" нямна ңэда юне вадети ненадумдаць.



Округна" физической культуре' няби спорт' серо тасламбада департамент' ерв Александр Кусенко лаханавысь: «Тюку конкурс смянхат ва"лэйдо' ңобт' ма"ламби. Хусувэйдо' манзаямда тидпой" теневада. Пыдо' ңобнзер" яна" спортм' нерня' минре". Саць тарана серм' нёда". Няңдо' сыраць вадёданана" ңацеке" ңобтики тарем' варемдо' мэ"ман' харваңгу"».

Сёбар" ед' ңадимы пирдырма таниява ёльце сава. Тарця серкад ехэрана ненэць' ңани" нита пир"мам' манэпата пыда спортм' иланда сехэрэңэ мэ"лаңгуда.

**Џанине Хорэли' падвы**

## Едэй" мутра" таро

**Ты" ниць иры' 14-15 яляха"на яна" тер" ңарка март' ңэдалёрмыць. Танияна нябимдей мэва' едэй" мутра" няби Россияхана илена" ненэцие" вадит' нямна ңэда тохолкова ңэвысь.**

Информационной технология нерня' минрени" ңэвахана мэна" ерв", проект сертабада", ненадорка" яха"на манзарана", хуркари" учёной" тасалковам' мэ"мыць, едэй" мутра" нямна лаханавыць.

Саяңгардахад тания' няхар" нява" ядэрмыць. Тандаярка тодо" тэнз" ненэцие" толаңгулава хардахана манзара пэвы Галина Косыгина (Ядне), ңэрм' тер"

серо тасламбада департаментхана манзарана Светлана Тусида, тамна ңопойдо' юне тэволана телевидение' редакция' ервҗэ тарана - Наталья Вануйто. Пыдо' сиддо' теневабодо', минрена" серодо' ваде"манзь хамыць. Яханана" ханзер" ңэрм' тер" вади лэтрамбива", хурка серо вадиана" нива ёхова' е"эмня ңадимдембива" – нядандо' тарця лахарём' намдавыць.

Галина Косыгина инда ядэрабцом' хэтась:

– Теда' илаңганана" вадиана" ханзели" лэтрамба пирьяна". Җарка няд"маңэ «цифровые технологии» нюбета" ңамгэ" тара". Приложения", мультфильм",

интернет мутравна минрена" урок", интернетхана ңэда" вади" ңобт' ма"лама' ё" вадидо' тохоламбада" таром' ха"авра пир"җа". Җани" ё" тер" тарця ңаво сертаби", маня" ңод" сидто' тотрев' ңани' пиртава". Илебей" ненэця" программированием' торомдамбабато' серо"җа. Едэй мутра ңацеке" мер' ңэвто' мю' палабтамбидо', нянандо' харто' вадамдо' тохоламбадо' нензелкаркаңэ хан"җа. Мэванда хав' ёльце ңока. Харе" нерняку' нибна" ңа", серона" ңахат яхадандо' вуни" манзадаңгу".

Җэрм' тер" серо тасламбада департамент' юне тэволана" ВК страницахана падна": «Ямалхана

тет ю" пир" тохолкулаваха"на ненэця", хаби", тасу" хаби", ңысми" вадаха" ңацеке тохоламбидо'. Џокханда округханана" ңэрм' тер" вади 4700 ненэця" тохоламбидо'. Тикэхэт 3676 ненэй вадам' тохоламбада, хаби" вадам' – 761, тасу' хаби" вадам' – 171, ңысми" вадам' – 92. Харе" вадидо' минренаңэ тарана, ңацеке тохоламбада самляңг ю" сидндет ненэць».

Россияна" тодо" яхат ңэди" ңобт' тэва"ма яляхаудо' тароси" нивэхэ' хань". «Дом народов России» нюбета яхана нито' и' ядэрабцохо" инзелевы". Тарем' тодо" ёхот ма"лэвы" няхатато' тоходана". Нито' хэты" теневабцо" пуна манзаяха"нато' таралңга".

# Сайнормы" ненэцие" мяд' тер пурҕава"

Инзелета"! Сайнорта" ненэцие порта" юнм' нэдарами". 1941-1945 похо"на сайнормы" солдат" мяд' тер пурҕа". Пыдо' фашистхат ямдо' нэдабавы". Маня" тюку яля' илевана" ед' ям' хэвхалмы". Юрнана" ни" ҕа". Масы" мядото' тер" нидо' тумдаҕудо'. Тикы' е"эмня тюку" вади падыбина".



Дмитрий Макарович Худин ҕавхы сайнорма' похо"на ява" лэтрамбавысь. Тенкана мята тер пурҕава". Пыда нямнанда падаркана тарем' падвэдонзъ: 1925 (1923) похона соявы. Ненэй ненэць', ВЛКСМ' тер, 1943 поход сие ниць иры' 27 яляхад сайнормахана мэвысь, 1943 по' пилю" иры' (1943 поход вэба' ирыхыд) нюртей Украинской фронтан' тэва-выць. 1944 по' яра ирыхына нямбимдей Украинской фронтхана мэвысь. 1945 похона яра иры' 19 яляхана няхаромдэй Украинской фронтхана сайнормы. 1944 по' яра иры' 22 яляхана ядаравыць. Новопортовской (Ярсалинской) ОВКхад РККАн' сайнорманзъ ханавэдонзъ. Нямнанда нэда" вада" ненадумда"мита падро" сер' падвы".

2 Украинской фронт' 206 стрелковой Корсуньской Краснознамённой Суворов' няби Кутузов' орденсавэй дивизия' 748 стрелковой полк' № 029/н 14.08.1944 похона падвы табеко' сер' тунитна красноармеец Д. М. Худин «За отвагу «нюбета медальм' ня"амвысь. Пыда 1944 похона яра иры' 22 яляхана Умань марад' (Украина) хэвхана сайнормандо' мальҕгана ядарейнэ нида нядабавысь. Тикы' е"эмня ненадумдавэдо'.



ХУДИН  
Дмитрий Макарович

1944 похона вэба' иры' 27-29 яляха"на Турда марад' (Румыния) хэвхана сайнорпато' Дмитрий Худин ҕамгэхэртан' сеянда нись пин" си"ив саюм' пирдалевы. Тикы' е"эмня нямбимдей «За отвагу «нюбета медальм', «Славы 3 степени» орденм' ня"амвы.

1945 похона пи' сие ниць иры' нюртей яляхад нямбимдей яля' нэсонд' Минюхов харад' хэвхана сайнормыць. Тамальҕгана товарищ Худин юкад вата сидя саюм' пендревысь.

Тикы' пуд3 Украинской фронт' 206 стрелковой Корсуньской Краснознамённой Суворов' няби Кутузов' орденсавэй дивизия' №

022/н от 20.04.1945 г. табековна Д. М. Худин «Красная Звезда» орденм' ня"амвы.

1945 похона сие ниць иры' 14 яляхана Дорннег харадм' лэтрамба Дмитрий Макарович миномёт" ту" помна нита нерня сэр" луци" траншеян' тэвавыць. Туниси" пэдваысь. Сэр" луца" пирдале я"амвэдо'. Ғани нида пумнанда товы", ҕобкана саю мэйрёда яхадандо' пидевыдо'. Дорннег хуторм' няюндо' ханавэдо'. Тамальҕгана ҕопойриңэ 12 солдатм' хадавы. Тад пуна 206 стрелковой Корсуньской Краснознамённой Суворов', Кутузов', Богдан Хмельницкой' орденсавэй дивизия' № 026/н 18.05.1945г. похона падвы табековна 748-й Клузской Кутузов' няби Богдан Хмельницкой' орденсавэй стрелковой полк' тунитна, 5 стрелковой рота' красноармеец Дмитрий Макарович Худин «Славы 3-й степени» орденм' ня"амвы.

2020 похона 748 Клузской Краснознамённой Кутузов' няби Богдан Хмельницкой' орденсавэй стрелковой полк' лабакм' Туркменистанан' лэтраванзъ нэдаравэдонзъ. Ғавнанда Туркменистан' нэвахана мэна ерв' ири сайнорма' похо"на 748 стрелковой полкхана мэвысь. Тикы' знамя нянандо' нэвы. Пыда сайнорма' мальҕгана ҕокханда 2500 вата орденм', медальм' ня"амвысь.

Роман, Бакэу, Бырлад, Хуши марад саюхат лэтрамбавандо' мальҕгана СССР' Верховной Совет' Президиум' табековна 1944 по' вэба' иры' 15 яляхана полкамдо' Кутузов' нюмам' мэта орденхана ненадумдавэдонзъ.

1944 похона хор" иры' 11 яляхана Верховный Главнокомандующий' ҕадимдевы №194 вато' сер' 748 стрелковой полкамдо' «Клузский» нюмгана нюмдевэдонзъ.

СССР' Верховной Совет' Президиум' табеко' сер' 1944 похона нюдя пэвдей иры' 14 яляхана Богдан Хмельницкой' нюмам' мэта 2-й степеньхана нэда орденм' Трансильваниям' сэр" луцахат лэтра"мандо' е"эмня ми"мыць.

Вашвар, Керменд, Сентготтард, Чурго марад лэтрамвандо' мальҕгана ҕамгэхэртан' сеято' нись пин" сайноромито" е"эмня СССР' Верховной Совет'

Президиум' табековна 1945 поход сие ниць иры' 26 яляхад полкандо' знамя' ни' Красной Знамя' орденм' мэвыць.

206 стрелковой дивизиядо' Ғарка сайнормахана ненадо нэвы.

Верховной Главнокомандующий' табековна 1944 поход яра иры' 18 яляхана №75 дивизиямдо' «Корсуньская» нюмам' нюбе"лавысь.

Умани марадм' лэтра"мандо' е"эмня, сайноро"мито' е"эмня СССР' Верховной Совет' Президиум' табеко' сер' 1944 поход ты" саполана иры' 19 яляхад дивизиядо' Красной Знамя' орденм' ня"мавысь. Краснознамённой нэ хэвы.

1944 похона сие ниць иры' 24 яляхана падвы СССР' Верховной Совет' Президиум' табековна полкамдо' Суворов' нюмам' мэта 2-й степеньхана нэда орденхана ненадумдавэдо'. Днестр яхам', Бельцы харадм', хэвхананда вэҕгалёда еся сехэрым' таҕумдамбавандо' е"эмня тарем' саву"мэдо'.

Таддикахад тикы' по' Кутузов' нюмам' мэта 2-й степени орденм' Прут яха' хэвхад саю пидевандо' е"эмня ми"мыць.

Секешфехервар, Мор, Зирез, Веспрем, Эньинг марка"на сайноромандо' е"эмня 1945 похона сие ниць иры' 26 яля' падвы СССР' Верховной Совет' Президиум' табековна Богдан Хмельницкой' нюмгана нюмдевы 2-й степени орденм' ня"мавыць.

Ёнаркад вата" дивизияндо' тер" орден, медаль ня"амвы". Поҕгадандо' 26 сайнормы" ненэцие Советской Союз' Геройнэ таславыдонзъ.

Киев, Никополь марка"на дивизияндо' нямна нэда" памятник сертавы". Воронеж маркана №5 гимназияхана 206 Краснознамённой Суворов', Кутузов', Богдан Хмельницкий' нюмга"на нэда" орденсавэй Корсуньской стрелковой дивизия' ед' музейм' сертавыць. Тамальҕгы дивизияндо' тер" ханзер" ҕамгэхэртан' сеято' нива пинвам', сайнормидо' тикахана ваде"ҕа".

С. В. Шулинин'  
луца вадавна падвэвна  
Руфина Окоэтто' ненэй  
вадан' тэвравы.

## ОБЪЯВЛЕНИЕ

**ВРЕМЯ ДЛЯ ВАЖНЫХ РЕШЕНИЙ**

**5 000 000**  
РУБЛЕЙ В ГОД


**2 300 000**  
РУБЛЕЙ ЕДИНОВРЕМЕННО

При заключении контракта  
**на Ямале**

Подробности на сайте  
**contract89.ru**



# Сайнормы" иринана" тенейна"



Сидяңг. Ю. Талеева, нэдабтавы



Тамальңгы" похо"на хоян' вэвако юн тэвыць. Сайнорма' нертей" ирийха"на Нюдя я' хойхад фронтан' 104 ты пэртя"

**1941 по' саво" ирий' сидя ю" нюртей яляхана яндахана хибяри" вэвако юнм' намдаць. Хойхана таңга илена", мюсертаха" юн' ңани' тэвыць. Хусувэй хибяри тенева, сайнорма сямянхат пилота сер", ңока маям' тэврамбада. Тарця серкат ямдо' нэкалманзь, илам' нерня' мима" е"эмня хибяри" сайнорманзь хаяць.**

Ненэцие" округханана" хойхад хусувэй мякад хэвы" таянць. Мань ирими, небяни нися Яков Иванович Талеев ңарка сайнормахана мэвысь. Пыда 1914 по' ты" ниць ирий' нертей толыркана ты пэртя' мякана соявы. Ѓавнанда нисяюда небяюда маянд' еремэ-хэнзь, тэси" хаёвэхэнзь. Пыди' мяд' терсавэй Оксина' ңэсыкоцян' илелмэхэнзь. Яков' сидя покоцянда панаць, нисядо' яңгумьсь. Хасаваком' тидяда Егор Иванович Талеев' мяканда ханавэдаць. Пыда хойхана, тидянда мякана вадёданась. Хасава ңацекеы вадёванда сер' тэхэ" тэворцеты, тарабнанда евы. Яков иңутна хасавако ңэвысь, ңули" мер' тэхэ"на" ңэдалёрць тухувьсь, хой' илам' мер' тором-давэдаць. Тохолкова' пирңэ хэсь, Тельвискахана тоходанвьсь. Сян по" тохолкость, Нюдя хой' яханда тэвыць, ПНОК – нертей ты пэрма' серм' тасламбада кооперативхана манзара пядась. Яков Иванович' падарм' тенева-на ненэця' ңэвысь. Ваеравы юр" по' 30-дей похо"на пыда сита тамна нерня' тоходанаванзь Няръяна март' ңэдарадонзь. Округхы советско-партийной школан' тэвыць, тохолковамда мале"мяхаданда, пуня' колхоз-ханда товьсь.



хаяць. Ныхыта", мэбета", мято' тер хаесь, хари" ямдо' хэвняд товэхэт нэкалманзь ңэдалэйдаць. Хойхана вэсако", не", ңацекеы" хаиць. 1941 по' хор" ирийхана фронтан' мань ирими, небяни нися Яков Иванович Талеев хаясь. Ѓули" нерде' пыда нябимдей лыжной батальонхана мэвысь. 1943 поход сайнорма' пудана яля" ңэсонд' Мурманской направлений нертей оленотранспортной батальонхана сайнормьсь. Ты" сайнорма' по" ёльцяңгана саванядаңгодаць, сайнорта ненэцяңгана" тарана" ңавори тэволасеты". Бойхад пенделевы" ненэцие нэкалпавы". Нина" тамальңгана ңока маям' манэ"мы", ңока тоенана серт' ереворцеты". Ханяна ңаврадо' тянэ ңэвакы, ханьтавакы"...



Ѓэрм' тер" ханзер" сайнормамдо' нисетыдо' вадес". Мань ирими, Яков Иванович, тамальңгы пилкабтёда" по" нямна мунзясеты. Маня" нива" хонрамбасету".



Ирикова" сянзетыва", хэвханана" илеварида нянана" савась, тикан' маймбасетыва".

Сайнорма' пуд ирими 1945 похона мяканда тэвыць, таминда манзара пядась. Ѓэсыхына илена" ненэця" падарм' тенева-на нямдо' Малоземельской тундровой Советан' хаңадонзь, таяна секретарьңэ таравьсь. Хусувэй серкана нида нядабасетыда, ңэсыхынандо' тарана серодо' мер тасламбасетыда. Ѓамгэ' пиркана мяд' терсавэй" хоян' танэйць, тэхэ"та маймбась тэвыць. Сидя юкад вата по" ямбан' Выучейской' нювм' нюбета колхозхана ты пэрңась. Мат" ю" похонанда Нельмин Салян' илельяць, ныланаванзь тарпыць. Иланда ямбан' хойхана мюсермы ненэць' харад ивнянда нивысь ңа", сайнормы ветеран ида пили" хой' нямна няркнавьсь. Ѓопой яхана хасенавам' ехэрана ирива" нида нядабаванзь ңэдалёрцеты, ты" ниць ирыхына хойхана мэсеты. Ты толабава', п р и в и в к а " ёльцяңгана тарода ңарка ңэсеты. Илебий" ненэцие иланд' табедамбасеты. Сававна манзараванда няю' хуркари" ненадумда"мида таян". Сайнормахад «За отвагу», «За победу над Германией в Великой Отечественной войне 1941-1945 гг.», «За оборону Советского Заполярья», юбилейной, ВДНХ СССР медальда таян".

Яков Иванович иланда сибё нись ңа", пыда ябдана ненэць' ңэвы. Сидя не нюмда, хасава нюмда вадась. пыдо' ңод" харто' яханандо' иле", нюдо' вадабавы". Ирими 1982 похона хор" ирийхана яңгумась, Нельмин Саляхана сюрэ. Сайнормы ирива" тенева", Саляхана не нюда Матрена Яковлевна Тайбарей, нюта ню", нюта ню" ню" иле".

Хусувэй по' ты ниць ирий' 9 яляхана Победа' тен' хэван' ңэвдо' нибклаванзь турцеты". Тены" похо"на хынёси" илевава" пыдо' нядандо' миңа.

Юлия Талеева' падвы



# Хайму" нятапёш мансламэхэн



**Нич" тонан хомана майдихиң. Хайнольш нэхэдма дядяң нельшуна «Ямал - потомкам!» нимита ассоциацихина җайта җашки нешади" дет тондота Советхана мэна" нидимтуң Альва Игрумович Пяк, катамтуң Екатерина Аучевна Пяк поздравийҗаш". Мячисайтач миҗаш", диланьч нямна дюничалаш".**



Таттама: А. Пяк тамы

Альва Пяк хайнольш нэхэдма похона дю" пота җаймай. Таньдэльшкана Альва Игрумович манде вьдта падилта җашки җаймай. Шаңкмян выңкай мансдям шелтапёмам чедимьямай. Хайнольма похона надка нета" нятапёш мансдаштомай. Ты" җисым паделъштомай, калиташ нета" няташтомай. Таньдэльшкай дилмта вивхальш Альва Пяк маньшту: «Таңичохона Пюдюня Каменный гораң кэвхана, мадахана дёделъштумаш". Шича бригадамаш. Чикиң камна ту җану" пят, калват пят матулпёш мансдана немай няташтуташ. Таньдэльшкана ты" җамши", нешади" катамы" калди", хайму" панэт хятмы" паныдю" хыдаң тың канхана Вынгихина җайта факторин' канаштунаш". Тай" ня чикехет неша" пэнтди" шехелэмна Талкан дельшат тайваштуньш». Хайнольш хитамаханантоң шаңкмян тэмс неша" майпёмай".

Хампляңк'дьяңкня похонанта

Альва Пяк Талкахай колхозан' тондунта'җэ манслаш чепьмай, шеэ'в'дьяңкня похонанта пи" матулпёта пильщик'җэ мэмытуң. Дети мидта" мя- ту" пят матулпёштомай. Кашем'дю" дьяңкня похонанта хомана мансдаманта де'эмня колхоз' им. Сталина правления тэдамайтуң. Чикиң пут калитанаңэ манслаш чепьмай. Катамайтуң калди"тоң чики минхантуң Талкан не нэй пйя җанохана таштомытуң. Шан пуң каймяхат «Верхне-Пуровский» совхозан' колхозу" ты" мэмахатоң, ты" паделъш мансда чепьмай. Хомана мансдямта миндеманта де'эмня җисың тэтаңэ' тэдамайтуң. Мансдавшта тыта" җисы пон хома паталт' камаштомай. Хайнольш нэхэдма дядяхана ассоциацихит «Ямал-потомкам!» мэна" ни"та" шита поздравийнан вёко хомана майдьяш.

Хайнольш хитама похона Екатерина Аучевна Пяк хампляңк'дьяңкня пота каймай.

Пыта 1930 похона дядяманымай, хайнольш чепьма похона җуп'дьяңкня пота җаймай. Нюча җаймяхананта Калпюд няңи выңкна дидимай. Дяди" тахана, кудкади" вайма" нумкна" нета" нятапёш мансдаштомай. Калиташтомай, тыхульштомай, каньдьяштомай. Екатерина Аучевна маньшту, җука каляхана дёдилмантуң мэты" Тазовский губаң нядём кяштомай". Катамайтуң калди"тоң вомантуң тай"хана чикиминхантуң пйя" бочкаха" хыдуташтомытуң". Чики җайватам' ни", җалтана җашки" шелтапёштомытуң. Хыдутама" калди"тоң туҗанохана мансданна" Халыңкалат няң канаштомытуң". Ту" җану" чу дишатат пят, пйя" мяту" пят җупчики неша" матулпёштомай". Тай"ня чикитоң калват" дельшат тың канхана тайваштомытуң". Ше"эмна мансдям паделъш" неша" җука чок' коштомай".

Чикиң камна Екатерина Пяк хайнольчи" панэт' хайтудана"

нета" няташтомай, хайму" җамлат җочи" тыпёштомай", тутыку" җомтапёштомай". Таньдэльшкана колхозхана мансданаха" велвотоң маньштомай": җыди хомана мансдаҗата", нятапётаханта" хайнодта" нена" мед нэхэдты".

Екатерина Аучевна колхозхана мансдаманта путы, «Верхне-Пуровский» совхозхана мансдаҗаш". Хайнодмаң дельшкана хомана мансдаманта де'эмня кудкади" медалюта", патлота" велду" мимы тады".

Чуки дилиң кашемдючимты дядяхана нэхэдма җалка Победаң дядя. Красная Армия' хэлаку' лусахана" хайнольш нэхэдма похот шитчет'дю" поңэ кады". Четаң таньдэльшкай хайнодмы" нешаңкат кадютатоң дику, хайму" нятапёш мансламэхэт шанлитуң кыди". Пуровский' районхана «Ямал-потомкам!» нимита ассоциацихина мэна" җалка нешади", куптаң мансламы" вёку, пуши" ништутуң дюл.

## Нихидётуң дюдан

Чуки дилихина 9 майхана Великая Отечественная войнахана хайнольш нэхэдма дядя. 1941-1945 дельшкай похона" җука неша" тэтнаҗаш". Шаңкмян җисын, шаңкмян мят" хайнольш чепьма дюнь тоңаш. Выңкна, пя" поңкна дидина" Җэдм' чел" нешаде" кукитоң мюшадтахатуң, калиташ, ты" паделъш мансламатуң дяхататуң Красная Армия' хаймыхи" канаштомытуң.

Хайнольш чепьмахана Калпюдкат кашем'дю" нешаң хайнольш канамай". Җыдитоң мед нэхэдмантуң мэты писамэй мансдаштомай". Четаң Калпюдкана куки мятутуң җявш улицахай шехелайтоң таньдэльшкай хайнодмы", мансламы" ветерану", труженику"

ним нимияң". Җоптоң – Семён Агичев ним мэ'җа.

Семён Андреевич Агичев 1921 похона Калпюдкай выңкна, Воентоң няна дядяманымай. Семён Андреевич таңичохона 26 июньхана 1943 похона Красная Армия' хаймыхи каймай. Хайнольш каймянта нельня калитанаңэ, кандянаңэ мансдамай. Хайнольш Ямало-Ненецкий окружной военкоматхат канамайтуң. Хайнодманта дельшкана рядовой җаймай. 1944 похона хайнольш нэлтомай.

Шичадио" пуң чена 16 майхана 2005 похона рядовой' Агичев нимня Калпюдкана җуп улицахай шехелаймтуң нимчиҗаш". Четаң чикен мемориальный' доскам' җытыңа". Ними мемориальный' доскамтон Энтак Айваседо ним нимита улицахана җайта

мят җытыңатуң. Энтак Лэнгевич (талям лусаң паталкана пыты) ненэй нешаң, Лаңың ню җаймай. Хайнольш каймянта нельня Калпюдкана дидимай. Энтак Айваседо таңичохона пювш дилихина 1942 похона Калпюдкат хайнольш каймай. Рядовой җаймай. 206-й запасной стрелковый' полкхана, 99-й стрелковый' дивизихина хайнодмай". Чешта дилиң путы 1944 похона няхал мэмаң дятадамай. Шанат лекду" мякна мэмай. Чикехет военный' комиссии' таньше тасламыта: шан хайноланаңэ никай. Талям дяхата җайтаптамытуң. Чикиң путы Талкан сельский' Совет' председателъҗэ мансдамай. Дятадэй җайнта денан выңкай мякта 1947 похона каймай, калиташ, кандяш Сталин ним' нимита колхозан манслаш чепьмай. Хыдаң



Таттама: А. Пяк тамы

1983 похона нэлтуш. Пуровский' район чел", Калпюдкана дидина" неша" хайнодмы няхадётуң – Семён Агичев, Энтак Айваседо нихидётуң дюдан.

Чуки дилиң кашемдючимты дядяхана хайнольш нэхэдма похот (80) шитчет'дю" пу кайны. Таньдэльшкай хайнодмы", мансламы" нешаде" маня" дяхана пон нитутуң дюл".

# Няхар" ю" Вэли

(нердена пелямда  
20 номеркана толара")

Сюдбя Вэсако, Ѓаятар Вэсако Нюдя Вэлим' ңэдарадй'. Пырдарй' пядй'.

Сидя Вэлихи ңод' мякандй' хаяха'. Няхар" по' ямбан' харасй" иле". Няхаромдэй' похона Вэли Ерв манзь ханада:

– Ханяңэва" параңодахана" ханданакы?

Ѓока"я Вэли" мунм' ни" соя".

– Нюдя Вэли, ңани' пяңгоданакэр! – Некада манма.

Ѓобтикы сер' ханзер" ңэвамда мал" ваде"яда. Сядэйда вэятавамда, Сюдбя Вэсако' сяркад тэмдавам', Вэли Ерв ңамгэхэртм' ни юр". Нюдя Вэлир ңэдалэй". Ѓобтикы сер" харта индя ватовна сертада. Сидя Вэсако' хэвувна хая. Некада Ѓылека" ңудахат мар҃ада.

Няхаромдэй' похона Вэли Ерв ма:

– Нюдя Вэли пареңодан' пыдар ханданакэн'. Тедав' ңани' тарем' сертаб"нанд, сит няда нидм' пират".

Нюдя Вэли самляңг хабтаркам' подер҃а. Техэ яханда сыра' ямбан' ңэдалы. Мэта тыта лы" нямд" мантэяд". Морадо' хавото' ёльцянд' вады". Нюдя Вэли Хэбидя Салянда ңэсонд' тэвы", нись нултаңга тамна' тяха' ңэдалы. Сюдбя подм' хае, Сюдбя Вэсакоход есям' ни хана".

Хардахана си"ив ялянда ханзер" хэвахад ехэра. Сибимдей яляхана параңодада юркабтада. Ма:

– Тедахарт' неканд ватовна сертаир".



Ханамдахура. Ѓэдалэй". Сыр҃а, Сюдбя Вэсако сехэрэнда ниня ңамды. Харта лаханакур҃а:

– Тедахав' сяркани хорт татнакы.

Нюдя Вэли Сюдбя Вэсако' хэвувна таминда ңэдалы. Сюдбя Вэсако ма:

– Мань сит тэваңгудм'. Хэбидя Саляханда тэвы", тикахавана Ѓаятар Вэсако, Сюдбя Вэсако ңобт' ня"мади". Няхаркав по тебар҃а". Нюдя Вэли пуй' вэта хаюрць пэй". Вэли Ервм' ханзь пя. Некада ни ңадибер". Нюдя Вэли ңули" выдара. Ѓамгэ' пир-

кана сенасй" Вэли Ерв ңадимя. Манзь ханада:

– Маня" хар"на" тебертава". Пыдар мят няку' хань".

Нюдя Вэли мяканда ңэдалэй". Инзелеб"нанда няхар"кав по' тебертахат я ледре. Си"ивхав по неканда сыңгрэда яңгу. Сибимдей похона Вэли Ерв ңадимя, ма:

– Мань ситипой" яңгоданась. Тедахав' сян ңобкана иле нива" пират". Нина" хэвнякуд теневахана".

Вэли Ерв – Нум' ңэвы. Нюдя Вэли – Илебям' пэртя, Ѓаятар Вэсако – Хэбидя Саляхана ерв҃э хая. Сюдбя Вэсако Сюдбя под' ерв ңэвы.

Марина Ярой' падвы



## Вада' хара"

- Сава меяко не нюхуд сава.
- Сава вада еся нём' нэңгу.
- Лохорта и" пуня' ни сюрхалт".
- Вэнзу ненэцяңгад савам' нён ңате".
- Пэвдяханда ңэдалаңгун – тэводана ямд мер' тэваңгур.
- Сияк вада хавыда.
- Са"ла ненэцям' манзара табедангун – ханяцей ңока манзаядамд' сертаңгу.
- Индкаданда хуторць писяхарт идна.
- Татыс' недрев' пёдор҃аха'.
- Ненэць' ха"махаданда таравы ңэңгу.
- Харта мякнанда лэк, вата нянда мякна манзара са"҃а.
- Ѓацекы" пёдаңгу", ңарка" ненэця" поёлараңгуд".
- Мая' тованда ёльць҃агана ни хонаркод".
- Неда' мюня пуданаңэ ядна лэк хабтрахан' нён ңа".
- Монаб"нанд лахаця нёд тэдорпю", харет мо"нэйнась.
- Хадерютна ненэцям' нёр писяд", нюд тарця" хабцяңо мэта".
- Хаюпа хэбат вэва вади маханд' тяха' моёпан".
- Халянд' сявм', лым' ханяри' нёд' моёпю". Ид" Ерв ненэцямда, ябсяңгун.
- Лэ"мор' сар"ню нёд тахабтамбю", сарёңэ ханда.
- Ед' вархад идм' нён ңэрпю" – нюд сэвдо' нялортаңгу".
- Тухунд' нён сабцяр", нямюр идраңэ ханда.
- Ми"мы ңамгэрид пырдарй' нёд ханабю", панод параңгу".
- Вэнекомд нёр" ладыбю", ңылекан' сит хусараңгу.
- Лярца' поңг нёд ңадпю", халядананд халэда поңга' сивна ханда".
- Ненэцие" ңамгэри нёд ханла", тикы е"эмня ңамгэрир ни юңгу".

Надежда Салиндер' падвы"



# Хибяхартм' ни" юрыбю"

Салыңгардахана нэрм' тер" ма"лурнацъ. Победа' ялям', невхы" сайноро"ми" по тензибтембицъ. Хусувэндо' ваде"мандада таясь.

Тарем' ма"лэвам' «Ямал – ню"на" я!» Ассоциация' тер" минредонзъ. Хаданана", иринана" ня нобанзер" Победа' ялям' ивхалпивацъ. Нармы" нина" сайноро"ми" по ваде"нацъ. Поңганандо' теда' сайнормахад товы" илебей ненэця" нани' таяцъ. Пыдо' невхы" иринато' тотрев' нобтики варемдо' мэ"на", Победа' ялям' хахаялтемби".

Борис Григорьевич Шушаков, Советандо' нудондана лаханасъ: - Нарка сайноромаха мэвы" нина", мядона" тер илева' ямбан' тенийна". Хусувэна" хибяхавада саю мардава' няю' нарка таром' ха"аврамбисъ. Ханяңы" сайнорнацъ. Мякнато' хаёвы" манзарацъ: ханецъ, халядацъ, тыдо' пэрнацъ. Нани похона нани' тарем' ма"лэхова", сензаңэ илехэва", илебей" ненэциена" нерня" тидхалембахава".

Вадида вадесо"махаданда, ирива" нармы" ненэцие" совет' терха" нуди" тер ми"нась. Помнандо' ядэрмани сер' Елена

Николаевна Нокэйм' лаханаконя"надамзъ. Пыда нацекы нэ"мямда ваде"нась:

– Мань нисями сайнорманзъ хаясь. Ленинградской областъхана саю мардамбисъ. Пуна таянд нисъ ту". Яңгумысь. Мань нацекэдамзъ. Нюд хардакохонана" Победам'



Няръяна лабкадамдо' серта"махадандо' харад' помна минарнадонзъ.

Та' мальңгы" по манэ"мы" невхы" иле"мидо' сейто' няркомба тензибтембасетыдо'. Лаханакурць ня"мы хадахани сава вади хэтадамзъ.

Тюку ма"лэвахана пон' нивы

маниевы нини" манэ"надамзъ. Нармы" ненэцяңгат ханяңэхэ"на илаңгана тарана" табеконамдсетыва", сидна" тидхалембасеты". Пыдо' иландо' ямбан' манэ"мэдо', намдавэдо' жока. Тедахарт сенз" нэя".

Руфина Окоэтто' падвы

намдаванда сер' небями няръяна имбытами екадасъ. Тад пуна паркхая пян' сэлнадасъ.

## Ява" лэтрамбади" е"эмня

Сайнорта" нина" нядаба Ямал' тер" мал" варемдо' мэ"на". Хибяхав харта инда сер' няд"ми нэдабтамби. Нани" ноб' сер' нядангурна". Тарем' Салехард' тер" Победа' яля' нерцюна СВО' няна мэна" яна" терха" тарана" наворидамдо' ма"лавы".

Тикыдо' сиднет ю" лабтэй' тернэ хэвы". «По зову сердца» нубета центрхана мэна" волонтер" няданговы". Хусувэй посылкадо' ты" назмахад, халяхад сертавы" навыдота", хасуй" наврахат пан"на. Неноховавна нацекы" падвы" письмо мюняндо' на".

Законодательной Собрание' нермбэртя Сергей Ямкин' вадавна, тарця" посылка" тэри няд"ма" ни" на". Тарем' нэдабтамбада" няд"мина" сиддо' мэбеламби". Ихинандо' тенева": «Мякнато' нямнандо' ибедорна", нидо' юрыбю»».

Ма"лавы" наворидо' Народный фронт' нермбэртя Иван Новицкий техэ яханандо', Ростов-на-Дону маркана ня"мангуда. Тамна' тыха' ява" лэтрамбадаха" нэдабтангуда.

Галина Кинчина' падвы

### Тасий" вадихойда"

Вандако  
Мальця  
Сар"ню  
Тирць

Имбыт"  
Мирета  
Сембяд  
Толь

Иня' няңы  
Наро  
Сэрне  
Тыра

Лы  
Ненэцъ'  
Сядобэрць'  
Тэмдасэй

Лэ"мор  
Сармик  
Сянако  
Ныйра

### Хобцо

Й и с ы д ю й к њ е б ь с э а е и  
с н д р л с а р ' н ю с ' њ э ь л н  
е т э м д а с э й ' с њ ' њ ц л я  
м о н а л ц н к э я с б б р ' '  
б б а р ц с ь а к е н р э с и д н  
я т в й р с в а н д а к о м т е я  
д л њ ы я т й в к б к в ь и т в њ  
е е б њ б в т д с й о " о р ы й ы  
д в й ь ы ь в с й с т њ с е р ь ь  
ь н ь в а м н о ь к м э ы т а њ '  
р л ц т и м б ы т ' я њ о ю а ц ь ц  
ю ы э ы ю я ц ' њ э е с ' ю я л к  
й с н и њ л д о р њ ы т ' ю б о н  
о я е к и м р а с ' ю њ " ' ы т ю  
р ' н я ц ь л а м л ю а й э м к њ  
а р р о м " э л я ' т њ " я ю ы л  
н л э в в э с я д о б э р ц ь ь в

Хобцо: Татьяна Сэрэтэгто' сертавы

Газета «Няръяна Нгэрм»	Главный редактор Яр Марина Тэтакучевна	ГЕНЕРАЛЬНЫЙ ДИРЕКТОР АНО «Ямал-Медиа» Зулинова Мария Андреевна	№ 21 Подписано в печать 22.05.2025 г. Вышла в свет 24.05.2025 г. По графику: 16.00, фактически: 16.00.	ПОДПИСНЫЕ ИНДЕКСЫ: на год – ПА701, на полугодие – ПР562.
Учредитель – департамент внутренней политики ЯНАО (629008, ЯНАО, г.Салехард, пр-кт Молодёжи, д.9, каб.708).			Тираж 3600 экз. Заказ № 0610 (тираж 3600 экз.) отпечатан в АНО «Ямал-Медиа» Юридический адрес: 629003, Ямало-Ненецкий автономный округ, г. Салехард, мкр. Богдана Кнунянца, д.1, каб. 106	Цена годовой подписки 166 руб. 84 коп.
Издатель – департамент внутренней политики ЯНАО (629008, ЯНАО, г. Салехард, пр-кт Молодёжи, д.9, каб.708)			Фактический адрес: 629007, Ямало-Ненецкий автономный округ, г. Салехард, ул. Чубынина, 39А	В розницу не распространяется.
Газета зарегистрирована – Управлением Федеральной службы по надзору в сфере связи, информационных технологий и массовых коммуникаций по Тюменской области, ХМАО-Югре и ЯНАО от 19 апреля 2012 года. Регистрационный ПИ № ТУ72 – 00559			Газета выходит по субботам.	Адрес редакции: 629003, ЯНАО, г.Салехард, мкр. Богдана Кнунянца, д1, каб. 106 тел. (349 22) 4-53-32
				E-mail: nn@yamal-media.ru